

Nunat Avannarliit Killiit Siunnersuisoqatigiiffiata kaammattuutit aalajangersagaata Inatsisartunit ilalerneranik Inatsisartut aalajangiiffisassaattut siunnersuut:

Nunat Avannarliit Killiit Siunnersuisoqatigiiffiata Savalimmiuni naalackersuisut, Kalaallit Nunaanni Naalackersuisut Islandimilu naalackersuisut kaammattorpaat suliniutit umiarsuit atorlugit angallannermi svovlimik aniatitsinermik annikillisitsisinnaasut eqqarsaatigalugit suleqatigeeqqullugit. Nunat kaammattorneqarput ikummatissat mingutsitsinnginnerusut, taamatullu aamma atortut avataasiorluni aalisarnermi imaatigullu assartuinnermi angallatit ingerlataasa pujuliornerinit svovlimik paaasinnaasut atorneqarnissaannik piunasaqarnikkut sunniuteqartumik avatangiisinullu mianersuussisumik nukissiuutinik atuinermut periutsinik ineriartortitsineq atuutsitsilernerlu pillugit suleqatigeeqqullugit. (Nunat Avannarliit Killiit Siunnersuisooqatigiiffianni Inatsisartut aallartitaannut siulittaasoq, Lars-Emil Johansen)

Immikkoortoq UPA 2015 / 142-imut akissuteqaat

(Pinnngortitamut, Avatangiisinut Inatsisinillu Atuutsitsinermut Naalackersuisoq)

Siullermeerneqarnera

Naalackersuisut sinnerlugit Nunat Avannarliit Killiit Siunnersuisooqatigiiffianni Inatsisartut aallartitaannut siulittaasoq, Lars-Emil Johansen, kaammattuutit saqqummiussamut qutsavigerusuppara.

Umiarsuarnit silaannarmik mingutsitsinerup annikillisinneqarnissaa pingaaruteqartoq Naalackersuisut isumaqatigaat. Naalackersuisut 2016-imi Kalaallit Nunaata imartaanut immani avatangiisinut inatsimmut siunnersuummik nutaamik saqqummiussinissaq anguniarniarpaat. Immani avatangiisinut inatsit nutaaq taanna, siunnersuut malillugu umiarsuarnit silaannarmik mingutsitsinerup ullumikkut pisartunit annertunerujussuarmik maleruagassiivigineqarsinnaalernissaanik malitseqassaaq.

Kalaallit Nunaanni 3-sømilinut killeqarfiup iluani umiarsuit aniatitsinerisa svovlimik akoqartarnerannik annikillisitsisussanik maleruagassaqarnermi iluaqutissartaasut ajoqutissartaasullu pillugit nassuiaammik suliaqartoqarnissaa pillugu siunnersuut taamanikkut Naalackersuisuusut 2012-imi taperserpaat. Tamatuma saniatigut Naalackersuisut silap pissusaata allanngoriartornera aamma umiarsuit angallannerat pillugit oqaloqatigiinnissamut tunngavissiaq suliaat. Oqaloqatigiinnissamut tunngavissiami ilaatigut svovlimik aniatitsineq aamma umiarsuit angallanneranni sivikitsumik silap pissusaani akuusartut sammineqarput aammalu teknikkikkut periarfissat nassuiarneqarlutik. Nassuiaatit marluk taakkua ataatsimiinnerup matuma ingerlanerani Inatsisartunut agguanneqassasut naatsorsuutigineqarpoq. Nassuiaatini taakkunani umiarsuit angallannerannit aniatitsinernut tunngassuteqarpiartut arlalippassuit qulaajaavigineqarput.

Umiarsuarnit mingutsitsinermik pitsaaliuineq pingaartumik FN-ip nunani tamalaani Imaani imarsiornermut kattuffiata (IMO) MARPOL-ip nunani tamalaani isumaqatigiissutaani maleruagassiivigineqarpoq. Kalaallit Nunaata nunani tamalaani isumaqatigiissut 1997-imi ilaaffigilerlugu akueraa, ilanngussaq 4 imikumut tunngasoq aamma ilanngussaq 6 silaannarmik mingutsitsinermut tunngasoq, tassani ilaanatik. Kalaallit Nunaata ilanngussaq 6-

imut tunngatillugu tunuarsimaarfeqarnera atorunnaarsinneqartariaqarnersoq misissorniarlugu Naalakkersuisut siunniuppaat.

Naalakkersuisut Savalimmiuni naalakkersuisut aamma Islandimi naalakkersuisut nunani tamalaani naapittarfiit pioreersut arlallit, soorlu nunani avannarlerni aamma issuttumi siunnersuisooqatigiit, aqqutigalugit pitsaasumik suleqatigilluareerpaat. Naapittarfiit taakkua aqqutigalugit misilittakkat aamma ilisimasat paarlaateqatigiiffigineqartarput. Naalakkersuisut tassunga atatillugu nalunaarusiat attuumassuteqartut nunat akornanni aveqatigiissutigineqartarnissaat isumaginiarpaat.

Taamaattumik oqaaseqaatit saqqummiunneqartut tunngavigalugit Naalakkersuisut sinnerlugit eqikkaallunga Inatsisartut kaammattuutitut saqqummiunneqartumut ilaliissasut inassutigissavara.